

道古堂文集卷四十五

仁和 杭世駿 大宗撰

墓表

通奉大夫例晉資政大夫宗人府府丞徐公墓表
乾隆歲在乙酉四月十有三日宗人府府丞徐公以疾
卒於錢唐里第公三子前歿季曰升煦甫童幼閱六年
歲在辛卯乃克葬公於橫山之周家埭而以 誥封二
品夫人孫氏暨側室 誥贈恭人周氏祔埋幽之辭闕
焉公嘗舉祭義先祖無美而稱之是誣也遺令戒子孫
不得妄有稱述家人所能道者歷官歲月而已升煦踵

余門而請曰昔者歐陽修葬父瀧岡自爲阡表煦蒙穉
無以爲也惟子一言先大夫可不朽矣嗚呼五十年來
凡習於公者零潛殆盡知公之深者莫余若誼不得辭
也公爲冢宰文敬公之子相國文穆公之弟諱杞字集
功號靜谷十世祖自河南遷錢唐曾祖日隆祖欽安皆
以文敬公貴 贈光祿大夫 經筵講官吏部尚書文
敬公娶於艾繼室以其姊實生相國及公公少時銳志
於科舉之學文敬公 予告里居公兄弟尚困場屋延
致邑中英異能文章之士校藝於凜存堂旬鍛季鍊詣
益適上公獨先得氣以去康熙辛卯舉於鄉明年成進

士改庶常文敬公老假歸省覲眷戀庭闈未卽赴闕
時乞假者衆

聖祖概予休致凡二十四人公在其列旋執文敬公之
喪凡里居十餘年

上念文敬公清德卽家以編修起用

世宗憲皇帝蒞阼 命公主廣西鄉試旋改御史歷京
畿道轉通政司叅議晉四譯館太常寺少卿雍正八年
奉 命赴廣東巡查軍政嚴申開礦之禁貧民失業者
衆與督撫大吏計口授田民氣甦息回京外調甘肅布
政使旋奉修城 諭旨公通悅不事家人生產領藩歷

十二年廉俸皆隨手散盡文敬公遺有水田數頃并宅一區悉賣以供板築之用而欠負猶纍纍也雍正十年請旨陞見命署理湖北按察使旋調湖南布政使是年冬陞任西安巡撫十有三年內調入京補授宗人府府丞

今上皇帝以公

先朝舊臣獲賜明史一部供職五載予告歸里
皇太后七旬萬壽在籍大臣朝京者開九老之宴

上虛一席以待公道阻久不至以位遜於公者充之非聖意也然猶恩加三級階至資政大夫子景熹以翰

編出守福州公前城工之項未完藉裕蠶而克竣三世
清宦於國恩家訓兩無憾矣公長身鶴立雄談竟日
夕警欬如洪鐘口不雌黃胸無城府得喪不縈於寤寐
財利不挂於齒頰在鄉邦爲鉅人長德在朝廷爲白首
耆艾魁壘之臣此海內所共目也景熹晉福建鹽法道
勤其官而死期公以達觀則非情償公以他福則無其
事祝予之慟哀纏心肺壽八十一而卒雖享長齡以論
公則猶爲減算也公娶於孫國子監祭酒諱岳頌女先
公十九年卒有賢行尊師教子助教王先生雲廷學優
品粹以言教兼以身教故相國及公諸子皆從之遊夫

人主中饋先生未朝食諸子不得食也先生未裝綿諸子不得衣也教授幾三十年而徐氏諸子皆成國器公初艱於嗣文穆公以第五子翼燕後公乾隆丙辰舉人官光祿寺署正次麗照國子生早卒次景熹乾隆己未進士累官福建鹽法道皆周恭人出也次卽升煦女五人長與四皆殤次適國子監學錄海寧陳璵三適候補同知長洲葉樹滋最幼者未字孫均國子生次增次坦最幼者坤殤孫女四人曾孫鉞銘曰

壽者疇也公嗟大耋不足以爲疇福者備也食子而不能收左髦脫而不髦兮願乎其至丐我昭其幽鳴

呼公勤其事敷政優清風勉勉追前修或誣失實公所
羞我銘律公重且周

中憲大夫瑞州府知府陳君墓表

大科之開也際不世之遇待非常之人將以代

王言備 顧問從容殿陛游歷坊局以儲異日槐鼎之用此

聖王寤寐旁求之至意也吾同年一十五人錢塘陳君泉亭與無錫楊君勗齋皆以諸生超授庶常吉士踰年散館改官楊君知江西德興縣事蹉跎以死泉亭浮湛郎署又十餘年一麾出守守官以死死之日官無餘財繼配趙恭人伶俜孤苦學二孤扶襯歸里終喪而不克葬非慢也力不逮也埋幽之石礱而有待踰時閱歲孤

子京始來告將以某年月日葬君於西谿某原余乃按其狀而表之曰君諱士璠字魯齋泉亭其號也陳氏系出潁川至宋南渡派分江西以信國文正公康伯爲弋陽之始祖繼遷餘姚之馬渚有湘露公者贅於錢塘始遷會城之後市街太平里六世祖學易萬歷癸未進士南京兵部車駕司員外郎從祀鄉賢建祠於里自五世祖以至君考皆爲郡邑博士弟子祖考諱邁贈翰林院庶吉士考諱孚衷以君貴累贈如其官三娶皆贈恭人而君則吳恭人所出也君屢試高等爲邑增廣生十試不售雍正十二年制府上蔡程公以博學鴻詞薦乾隆

元年十月試於保和殿拔十五人而君名在二等第七授翰林院庶吉士散館改授戶部河南司額外主事河南省有鹽礫飛沙河灘壓窆等地畝千餘頃無業賠糧民人籲部請求豁免遞解回籍者數矣君與同僚武定李君斟酌定稿力請竟從其議有佟姓家主告發廣東駐防係其戶下冊檔研審有據同事受賄爲之出脫君以名分所係決然割斷旋被告發西臺嚴訊得實以營私治罪而農部一官無恙實藉君持正之力有旗人仇家誣以先人係某姓戶下遂致子孫不得仕宦君委曲詳勘立破其誣首人允服兩事相反而不膠於一轍

虛公處事君無成心也已而實授主事充戊午科順天鄉試同考官辛酉副中允朱良裘典四川鄉試明年晉江南司員外越四年晉福建司郎中君前任員外時江南司有雍正十二年溧水等州縣被災其勘不成災區畝飢民例不加賑當事以社穀及官紳捐米煮賑屢爲推覈且欲報叅賑米四千餘石著落原辦官追償接任者又以社穀原屬地方公輸儲備歉歲此固向有諭旨仰體 皇仁非動支正項可比況業已賑去官更更易何處責其償還一二苛細者謂旣屬公捐卽爲公項堅執已見牢不可破君力主銷案十四年塵案一旦

掃除州縣得以免累君遇事不辭難壹以清案牘豁拖
累息事寧人不與同官立異亦不曲徇上官爲郎十一
年出知江西瑞州府事以豈弟之心化刁頑之俗修學
宮葺橋梁復譙樓平米價次第舉行暇卽與諸生講論
文藝士風興起中丞胡公寶瓌雅相契重歎爲品高學
邃積勞疴作移疾俟代而已不可爲矣時乾隆丙子閏
九月六日也享年六十有七文武僚屬以迄商賈士民
遠近奔赴行哭失聲遺愛可徵口碑如一君初娶於張
生二女一適同邑張慶增一適長洲王邦譽繼以趙生
四子京國學生寅邑諸生三四皆塲銘曰

噫乎瑞州陳使君生有惠政州民云六尺豐碑高於墳
下馬讀碑以我文

朝議大夫刑部貴州司主事吳君墓表

比部吳君葬其元配程恭人於資口復於其左築生壙自爲誌銘述其生平之志與其曠遠之懷以及姻連氏族甚悉乾隆歲在己丑君年七十五矣末疾不慎遂至不起屬其子封英曰表吾墓者宜莫如杭君嗚呼余文之不異於人人審矣君臨沒墜言鄭重誣諉何哉武林自西湖入社而後風雅衰息幾二百年余被放歸田於南屏開設壇坵金江聲觀察丁鈍丁隱君周辛老厲樊榭兩徵士牽連入社與君爲文章性命之友皆以前歿衰遲偃蹇獨有余在肩後死之責君不余屬而誰屬也

乃按其狀而系之曰君諱震生字長公可堂其號也姓
吳氏吳氏望出延陵其遷歛者以唐左臺御史少微爲
始祖九傳至元公遷於豐溪之陽歷二十七世爲君曾
祖諱茂吉國子監生祖諱豹然仁和諸生以君貴馳贈
朝議大夫如其官父諱之驂明經鄉飲大賓封朝議大
夫母羅恭人縣令玉受公女生君而早卒君才氣益涌
千言立就從武進秦孝廉宮璧學爲制舉文紆餘卓犖
遠有家法弱冠受知江夏胡公澗鬱爲選首五踏省門
薦而未售遂棄去入貲爲刑部貴州司主事奇請它比
獄無冤濫以獄吏少 氣自雲司不可久居乞歸不復

山營葬高曾祖父塲誠盡慎無忝所生樂湖山之勝買
宅太平橋側濱河築樓三楹顏曰舟菴贈公所自號曰
吾公魂魄應戀此也性耽吟咏詩不下千百餘篇尤工
金元樂府熟諳南北宮調分刻節度凡古今可喜可愕
之事悉寓之倚聲竟入酸甜之室行世者凡一十二種
嘗與厲徵士丁隱君買舟同遊山陰盡覽越中之勝而
還倡和詩朝傳夕徧一時紙貴少嬰疾疾博綜醫術王
宇泰張景岳兩家之書橫覽貫弗洞垣一方青烏家言
人各異說獨以仰止道宗爲準的著葬書或問數篇發
明斯旨垂示子孫勿爲他岐所惑又著吳氏先塋志自

芳田祖墓以迄資口新塋繪圖立說刊刻成書讀莊有
摘莊一書別有姓學私談太上吟金箱壁言豐南人事
考已行世晚年徧覽竺乾之書著大藏摘髓余與君初
未識面君割新宅之西偏成邱伯之讓自歛道杭每接
言論輒移晷不忍舍去語所謂白頭如新傾蓋如故余
與君兩無負焉君卒以九月五日越日余往哭之肅然
風開帷堂英爽猶顯顯在吾胸臆間歛歛乎哉君初娶
率溪程氏生子慶貽旋殤繼以無錫秦氏一子卽封
英也翰林院待詔一女名蕙詒側室虞氏出適布政司
理問程璧孫三揚宗和宗翕宗卜以乾隆三十五年某

月日反葬於休寧余未及臨其穴也亂以銘曰
預爲壽藏始漢趙岐圖畫賓主四賢是師自爲誌銘始
唐王績青山白雲寫所素歷以方今古豈有不逮長達
死相破除貪愛衣足斂形棺足飾身譬以巨室而偃歸
人狐死謂仁首邱焉依況公久客云胡不歸魚躍拂池
旒蘇振動轎車卽塗山迎水送率川如帶距墓七里異
椁同牢九原伊邇高壟四尺美櫬十尋旣安且固樵牧
不侵

贈奉政大夫戶部員外郎費君墓表

君姓費氏諱啟昭字霞初湖州歸安人昭勇將軍福寧大總戎鵬峯公之長子也世有令德炳於先志君生而穎異讀書工文章爲學官弟子員三試省門連見賞於有司輒以額滿報罷少司馬吳公應棻選君談公九乾文學沈公允相孝廉沈公士楨皆里黨魁傑與君善議論文字相往復不能屈君就已下祖母嵇太夫人卒大總戎墨經治軍旅春秋窳窳倚君而理母夫人顧族中哀三世不能舉葬事君行營善地大起封樹以遣北堂之憂有以急告傾囊橐如渙汗不責其信或稱貸而益

之從兄弟共釜而炊共席而坐晨書夜誦聲殷帷幔家
法爲世稱日月不居體魄遽降康熙五十三年三月二
日遘疾卒於菱湖里第年僅三十有九戚黨哀咷有失
聲者娶前溪吳氏賢明有淑行有孤曰我衡年甫十四
執喪如成人以大總戎在哀不逾禮繼官戶部爲員外
郎監大通橋倉筦錢法得贈君如其官乾隆十年二月
三十日自京師歸始克窆君於菁山之原祔從其穆禮
也越兩月乃得美石爰樹碣於墓門余交我衡驩若昆
弟誼甚摯來乞銘不可辭乃表以銘曰
開也有先收也有子遺書滿家未見其止年位不充贈

崇幽宮高其邱竊耐於先公銘詞撫實誅行謚迹菁峯
嵯峨光我史筆

贈奉直大夫奉化縣縣丞胡君墓表

君諱隆字景初號岫齋先世有軍功自許州調大嵩衛
因家焉九傳至君父振卿以君弟璉貴贈明威將軍母
李氏封太恭人君起家自戶部寶泉局大使再爲丞凡
四攝令事所居不越濁碎之職得尺寸之柄不肯少自
假借歷有循績可紀君之初爲寶泉局大使也局中役
匠數千人米鹽凌雜率取辦於鑪頭恣所侵尅往往負
官錢率以身質經年不得出君至懲鑪頭之尤橫者酌
平物價匠困大甦歲終停鑄負者猶什錮一二君悉縱
遣之與約開爐畢至無一後者遷江南涇縣丞令數以

疑獄相委當機立辨攝旌德令革雜征之累民者遷建
文廟拔姚士勳于童科卒成進士文教蔚起富僧不戒
於火弟子燬焉僧懼入金求解君叱之曰死可以賄免
乎苟無他何以賄爲僧感泣去旌士民走送者數
千人所過環號曰好官行矣改攝盱眙歲飢君首倡輸
米市價頓平民賴以濟事往以餘金爲義倉總督邵公
將疏薦會疾卒不果戊子歲涇大水民舍漂沒渡舟爭
攫財物君亟下令救一人者予一金凡活數百人庚寅
涇復大飢亡命者集千人將爲亂君馳往解散之語縣
令亟開賑不則民且變令辭以未得上命君力任其責

廉得亂首子杖母敢譁者巡撫劉公爲好言勞君曰是役也微君幾殆涇令缺攝縣事邑久旱禱烈日中走七十里至岑樓峯潭有蜥蜴二游水面貯以竹行不數里雷雨交作四境霑洽邑人呼曰胡公雨君雖未卽真方次第施行所欲興革者遽以母憂去職服闋補浙江奉化丞攝鎮海令事其治行如前時以勤死官嗚呼君之施於有政者如此其赫焯也而內行尤茂方康熙壬午癸未間東土薦飢君罄所積散之親族明年大飢道殣相望君宿儲旣空貸錢粟貽諸弟戒曰親族有一飢而死者非歲也我也三年三族皆賴以全活遭母憂時已

及耆年戚戚如嬰兒行營善地墨食克協身臥土窟中
驗氣冷煖凡三日夜封樹旣畢結廬墓側家雖至近不
一顧也鄉人卽其處樹碑儒官鞠濂紀其事大吏爲聞
于 朝朝議旌其門齊魯文學之士莫不知有胡孝子
者君以雍正四年某月日卒春秋七十有三明年子文
伯葬君於雙山祖塋之兆以君元配蔡孺人祔君本階
授修職郎文伯爲禹州知州例得封奉直大夫不及待
贈如其官其子女嫁娶閩閩詳德州孫大理所撰誌銘
中

沈先生墓表

先生諱世楷字崑輪先世吳興會王父岷陽始來遷仁
和縣之古井里王父子羽通春秋有盛名于時父怡懿
修懋行實鍾美於先生生而敦重不佻勵志問學文不
循俗年二十有七始爲學諸生不苟訾笑不苟然諾不
苟取子有水鄉之田二十雙僅給餼鬻藉友教以濟凶
荒其廸諸生也辨偏旁諧音韻審句讀乙注勾貫洞達
明白疑似影響之談不涉於口耳狙詐功利之習不關
於心胸目力不浪擲於蒙養之年精神不虛施於無益
之地故雖中材皆粗有成就而人世豐美娛樂之境先

生曾不得一歷焉德配曰陳淵默恭靜笑言不閉潔酒漿謹灑埽爲諸生代給都養之役豐儉有度早晏有節遊先生之庭宇者如始至在門牆者久忘其爲客也予年未踰冠先生攜之東西未嘗一日廢學飲之食之教之誨之事孺人如慈母而嚴師無論已乾隆丁巳先生春秋六十有九八月二十二日考終鄉里明年戊午長君如焯自大梁來京師請文表墓夫先生之行與文深矣廣矣其有造於諸生也厚矣嗚呼石可泐也而德不可磨鏡余斯文以尉後賢以式來哲

文學汪蘅洲墓表

君名浦字蘅洲姓汪氏曾祖某自歙縣來遷於杭占籍
仁和祖嘉祉國子學生父坤中康熙甲午科舉人君內
行淳茂孝親友弟闈門無諍厲聲與人言不肯少忤其
意爲文師宋三陳先生少陽之暢同甫之豪止齋之簡
易左右采獲皆能涉其津岸研析經義不琢自雕年十
九補學官弟子員試高等爲增廣生明年餼於學官又
明年某月日館於歙之姻親唐氏遂病肺以死年三十
有三余與君同里閑少相狎也同爲諸生連試於有司
以文字相戛厲余性通悅叫呼笑傲高睨大談粹不可

近君獨拙口鈍辭稠人廣坐中不肯少由論議遇有疑
難退必綜覈本始不少寬假卒問以事則條對如響嗚
呼君之爲益於余者深而余之所資於君者亟墓草已
陳車過猶痛蓋非獨以朋友之故矣君弟沈旣葬君來
請文鏡諸石乃爲論曰世皆以距壽顏天致疑於天夫
天之爲天豈拘拘以一二人之故哉距可以天則壽之
顏可以壽則天之有定理無定質也嗚呼蘄州謂君爲
壽耶而年止於斯謂君爲天耶則夫蚩蚩之氓蠢蠢之
衆坐臻大耋而草亡木卒者其得謂之有年哉

文學鄭載黃墓表

君爲有宋名臣介夫先生之裔孫世家龍江曾王父諱
廷簪以諸生結鄉里捍流賊戰不利闔室焚死王父諱
士登時依母家得免始來遷浙東之衢州占籍西安父
諱文忠不顯君天性孤迥避俗若浼爲文煦鮮榮而侈
冷汰探幽抉微動中理解江夏汪公視浙學高其文列
君名于黌序時方相誘爲科舉之學君獨治經史愛翫
古文辭無間寢食體素羸病中骨髓而志益厲不呻而
吟以詩書爲藥餌元氣內耗形神漸離嗚呼君之生也
與病相終始君之病也又與學相終始位不克揚年不

克壽何憾哉伯兄明葬君子黃土壠之祖塋懼其無聞也
使子萬年來乞銘銘曰

家三衢姓鄭氏光琮名載黃字隸膠庠勤學死生庚辰
訖乙巳廿加六年止此配以吳不宜子以毀卒距一祀
歲丁未同穴始槨可材謫停史徵銘辭不虛美刻堅碑
永無毀

顧包山墓表

君顧姓名錫祜字萬斯包山其改字也江南揚州之興化縣人生四歲而孤兄于觀教之學問爲詩清遠有理致沈思爲文不知有孫樵劉蛻也幽奧靈異時時近之兄以衣食走四方或闕不能繼君行求甘膳奉母益歡兄出比喪其妻若子醫藥棺斂貧不能支然倚君卒就兄繼室矣旋走京師從人往來吳會間每歸輒復出視其家如郵置君閔兄冢嗣不繼以貧故不遑寧處請於母之河南叔父官舍內顧無疆近之親單丁衰戶震來號號脅其兄以不得數出君之用意遠矣旣至河南米

鹽凌雜摺拄內外一署倚君牆壁旣而叔父調官山東
歷六縣皆恃君以濟叔父卒官在平粹無以斂君單騎
入聊城夜經古戰場青燐熠耀繞馬足鏃入脛骨血涔
涔下不及省視卒得美槨以歸終舍殮勿之有悔而君
病竟以此厲時發時已越兩載遂不起見于觀以秋試
留京師聞君訃悲傷累日夕歸將葬君於蘇顧莊西南
之阡撰行狀請予表君墓嗚呼君非有瑰琦之行矯厲
之節循循門內天性深摯歷危苦而不亂雖古之純孝
不是過也異日者寒松颯爽古礪奔洩常有祥鳥瑞鹿
哀鳴躑躅與君魂魄相終始而君爲不死矣君死時年

三十有五娶于陳

道古堂文集卷四十六

仁和 杭世駿 大宗撰

墓誌銘 墓表

封一品夫人晉封一品太夫人徐母曹太夫人墓誌銘

故錢唐相國文穆徐公以乾隆十五年歲庚午筮葬於茶坊嶺之原後十有二年己卯德配曹太夫人卒明年十月癸酉公子以烜等將祔葬太夫人於相國之墓走使索銘按狀曹氏系出江右六世而吳塘公徙江南上海再傳少宗伯諱勳者世居嘉善是爲太夫人曾祖祖

誥封一品夫人嗣晉

封一品太夫人男七人以烜太常寺卿之煒二品廕生
翼燕光祿寺署正出後叔父杞荀龍雲南鄧川牧殿恩
順天府治中應衡襲雲騎尉山西靈石令履端國子監
生女二人適霍邱教諭張宏浚太子少師兵部尙書梁
詩正孫十三人孫女四人曾孫四人曾孫女二人皆詳
見相國墓誌銘曰

昔在名畢左右王室翳獨內德純也婉婉壺範闡乎前
聞欽茲嬪則作儷偉人稟靈富媪象德厚坤川流淑問
光榮沚蘩蹈和納順益大其門有命自天肇錫魚軒

處豐能約在貴而貧如何不淑媮星夜昏畢如填如華
表蠹雲實維相國之幽宅貞同穴於青珉旣固且安著
我後昆

封太孺人袁母陸氏墓誌銘

母平湖陸氏文學時雍女歸同邑袁府君種玉舉三子
曰廷瓚曰安曰載麟府君爲名諸生以文教授旁郡邑
母聘里先生爲諸子師躬菲食飲而事師如嚴賓銅槃
異饌之奉黽勉有無十年如一日族子來學者均體一
視或翼而長之率屬婢媪相從夜績鐙火熒煌絡車紡
甌聲與誦讀相間凌晨起諸子起就塾疏記其勤惰府
君歲時歸舍舉以告請致賞罰故諸子畏母猶父然卒
就儒業始時家故貧自母勤於操作耕織有餘資稍稍
益買田宅積十餘年家漸起急戚黨之困寬佃戶之負

仁恩四周家法峻整康熙歲在庚子十月一日以疾告
終春秋四十有五蓋先府君十年卒營兆未卜也安與
余同門友善連中科第出宰劇邑奉遵母教務以寬大
化民傷母懿範不彰于世數以貞石之辭爲請余惟易
稱嚴君兼父母之謂後世寢失斯旨母能以嚴成其慈
袁氏儒風不替而保世滋大是中銘法其葬也以乾隆
某年月日在俞家浜之新阡銘曰
袁維名父爰立師道母也克紹匪怒伊教暢我儒風蔚
爲女宗徽銘考實不文以質後賢繩繩鑿此堂密

封太恭人馬母陳氏墓誌銘

乾隆二十有九年某月日祁門馬曰璐將葬其母陳太
恭人於廣陵某鄉之原手南昌萬學士承蒼所爲傳述
母行事甚悉先期請爲誌且乞銘按傳恭人江都世族
年二十來嬪於馬贈朝議大夫幼攜府君以禮接之實
爲窳室時洪太恭人生二子矣長曰康早殤次日楚府
君伯兄聘汪氏髡兩髦而遽卒汪氏之死靡他貞柏舟
之節曰楚之當後伯兄禮也贈公求嗣之心甚迫恭人
連舉二子曰瑄候銓主事加二級贈祖父如其階洪太
恭人與恭人均得受封曰璐候銓知州名試詞科不

肯就與余同歲有名贈公未及者而棄養顧恭人而言
曰吾祖碧筠公前明諸生治經有聲吾子皆可教必令
其以文學顯名贈公旣歿恭人益延名師友督誨二子
以學曰瑄曰璐不以俗學繕性而志不求時名清思竊
渺超絕塵壚親賢樂善惟恐不及方聞有道之士過邢
溝者以不踏其戶限爲闕事恭人益炷酒食給僮從流
連竟日夕以申緇衣之好勾甬全吉主祖望吳興姚文
學世鈺錢唐厲徵君鶚陳布衣章仁和張孝廉燴皆天
下士也恒主其家登堂拜親申論古義言泉濬發恭人
從屏後聽之喜曰吾子如此可以慰先人之志矣恭人

性仁愛洪恭人有女卒哭之過時而哀曰楚遺孤女幼
親鞠育之迄嬪高門鍾念不置恭人之卒也歲在甲子
月在乙亥日在戊辰曰瑄艱于子曰璿有二子振伯振
仲以振伯後兄銘曰

猗與母儀洞識本元提攜二雛笙典珠墳行仁蹈義蔚
爲清門劬躬有造下報厥考奧隅永藏坤德彌藻刻辭
貞石求世可道

周節母倪孺人墓誌銘

會稽周先生澹客高才不遇遊京師歸鬱鬱以死孺人倪氏疾乎醫藥歿乎葬埋育其遺孤子女以至遂長惇惇爲嫠者三十有五年康熙庚寅用老疾終有子曰鉞守先人之遺訓行身無玷尤學不爲俗儒而薰人以善狀母苦節請於朝大吏來旌其門有孫曰大樞次大母事爲傳傳云母姓倪氏其先浙之上虞人五世祖諫明進士歷守四郡有績可紀從曾祖元璐徙家會稽爲明忠臣父運雯博學高隱娶於周孺人其長女幼卽謹於言笑舅氏曰倪爲舊門兒莊靜中禮法宜爲吾家婦年

二十二來嬪於周逮事王姑承其歡所天不祿慟絕不
入勺飲從君姑言匿哀茹痛居窮而貞大樞生三歲而
失恃孺人以大母母之恩斯勤斯罔或不周君姑遘疾
頽辱之事萃焉濱於危無怠色居喪哭泣過時一目失
明俄而病劇鉞瘁於醫禱至膏糞以爲驗嗚呼孺人以
節以慈其子以孝君子謂爲難方孺人葬時納壙之石
未有辭也大樞曰大母百行維苦節之以苟銘句於壙
不啻駿曰然銘曰

以育其良再世而章發聞幽光母也不死有庾黔婁記
在傳史

邵母應孺人墓誌銘

文學復菴邵君旣棄養孤寶階寶勤卜兆於普福嶺之東乞銘於天台齊少宗伯猶未寔也越八年而德配應孺人又卒時乾隆戊子八月二十二日也壽六十有八寶階等將以臘月二十二日合葬於是嶺之原麻衣竹杖面深墨踵余門而泣告曰齊公志吾父行事詳矣而未一言及母也孝慈恭儉吾母之庸行悉數之更僕弗能終也姑舉其要惟子一言吾母爲不死矣余視其狀孺人系出慈溪前明侍御太室之曾孫處士玉書女也事繼母服勞奉養能竭其孝提攜兩弟有恩年二十三

來爲邵氏婦和於後先得繼姑歎篝燈佐讀綫績箴管
未嘗頃刻離左右辨色而興長裾椎髻猥屑煩辱之事
莫不躬以爲復菴得肝氣疾稍拂意則色然怒孺人巽
顏受之弗校也疾亟脇不貼席食不甘味夜禱請以身
代逮不起搶呼累日夕嗷而不能出聲委頓至數月而
後復家稍裕孺人操作猶不怠子孫婉言以節勞諷則
曰民生於勤勤則不匱吾非好勞也吾懼汝家之匱也
子婦聽而請代姑可之雖逸勿逸雖休勿休精神意指
恒若始來爲婦時終日蔬一盂一布衣經年不肯易子
婦婉言以過儉諷則曰惜食有食惜衣有衣吾非惜衣

食也吾懼汝輩衣食之不繼也勗兩子以學母致一日
舍業以嬉束身禮法咸能自樹以繼成復菴之志嗚呼
孺人劬躬以燾後迹其所言證之前史所載賢母有其
言所及亦有其言所不及者悉記之以爲型家者法後
有劉向杜預其人者可采而述也銘曰

母翼兩子以有立恩斯勤斯古莫及吁嗟史筆果誰執
苟傳賢媛母當入嶺路東趨勢屈摺元武鉤陳相拱揖
宛宛同穴啓荒隰寒日韜光百蟲蟄鼠年牛月月加廿
竒零二日吉永襲無有後艱家道給子孫繩振兄弟翁
負版哀哀齊不緝血淚沈瀾如霰集冢人斧蒞且莫急

翠琰鑄華墨猶濕

先姊吳母杭孺人墓誌銘

姊姓杭氏吾先君可庵公長女五世祖自上虞徙家于杭遂爲杭之仁和人性至孝方三數歲母夫人王遵微疾輒盤辟牀第間號戀不忍暫去稍長授孝經女戒通論孟大義工楷書指示九章算輒立曉先君治外凡米鹽凌雜一以委姊無毫髮遺誤佐母氏供中饋暨燂齏泔沈絲枲縫紉之事咸有法則淑慎之儀笑不見齒足不踰柵親串間行慶弔禮端默終日不肯妄持面見男子年十九歸同邑吳銘爲繼室初先君慎于擇對欲得謹愿誠慤之士培厚福者爲相攸時銘方鰥居玉貌溫

潤退然如不勝衣言啞啞不敢肆試以事井井遂因其
請而許之姊旣歸吳氏敬于尊嫜先後之間謙約惟恐
不後視諸姑如女兄弟吳氏羣從同爨者幾三百指無
間言性勤簡于自奉又所育子女多自乳旋得血疾每
病姊嘗量水稱藥博求醫術凡所以扶壽隄疾之道靡
不至歲間三四病病輒良已今年自知不起促走使迎
吾母曰母來吾相見祇此次母持之慟而神色不異擗
搗家事清晰如平時歿之日猶以不及終事舅姑爲恨
云生於康熙甲戌四月十三日歿於雍正辛亥九月十
五月年三十又八子男子二文源文漢幼慧後數

月亦殤女子子一字朱某月日姊聳卜葬於某山之原
其弟世駿爲之銘銘曰

孝友愷悌蓋莫如姊碌碌者生而令姊死有孀者女括
髮襜褕踴身投棺必欲殉矣強抱持之幾毀其齒幼兒
瑤環若奪乳只爲煦嫗焉雪涕不止哀哀慈母老令哭
子子何人斯執筆銘此

封一品太夫人楊母柳太君墓表

太夫人姓柳氏山東歷城人文學諱溥女來嬪於楊實
爲 贈光祿大夫公蒲府君之配入室卽以賢孝聞君
姑呂太夫人病癰久不治奉養惟謹劑殺之齋不假手
他婢妾比卒哀毀幾不欲生君舅傑字府君以廣西左
江都司僉書投簪歸里值歲荐饑斂家所有爲粥以食
餓者日且數萬計憂不能繼太夫人斥賣奩具佐之事
賴以濟所全活者無算客晉人也五十無子自質遷來
歷下謹愿可倚贈公遇之厚爲聘良家子旣委禽女閱
不肯所得金又垂手盡毋計窮奔號太夫人前以情告

太夫人哀許之別選於他竟焚要契贈公好施予待以
舉火者衆姑姊妹之取求者太夫人應之無倦色子弟
貧不能就學贈公開塾招徠之太夫人時其食飲煦嫗
覆育隱若慈母卒多所成就無祿贈公早世諸孤半猶
髫髻太夫人專爲嚴君翼而長之文通武達發聞清時
賢勞庶官折衝萬里移孝教忠 朝命屢賁 綸綍稠
疊履寵慮危以故諸子中無有墜行玷先人者旣踰大
耋神明湛定乾隆九年三月二十日考終懷安署遞棺
歸里以例得人會城哀榮旣兼典禮斯備子男子七人
大中穀城令先卒大勳滁州知州大凱寧夏總兵大鏞

歲貢生大紳昆明令大崑懷安令大立張家口副將孫
男二十三人承重者大中子嘉賓孫女十一人曾孫二
十五人大勳以公事至錢唐交余厚某年月日歸將葬
太夫人于長清縣金村峩嶓山之左穿贈公之封禱焉
伐石表墓請文以示久遠嗚呼庇家事裕後昆賢母所
同也迹太夫人前後所行事毅然有古烈士風予不文
耻爲媿嬰之辭雝山灤水間大書深刻其不媿矣乎

唐母施太君墓表

太君姓施氏山陰良族仲和公長女也年二十有八繼室于唐逮事君舅撫前室子有恩事新齋府君無違言年四十一卽喪所天搢拄內外婚嫁子女以節儉隆其家以慈惠溥其施以詩禮嫗其業諸子皆克有立亡何仲季先後蚤世太君鬱伊震悼搜其天倪精氣內鑠疾不可爲以乾隆十有四年十月十七日棄養春秋六十有六前室余太君生三子一女學泗國子監生學洙諸生先卒學源國子監生爲叔氏後女適諸生柴濤太君生二子一女學清國子監生先卒啟升副榜貢生女適

舉人孫泂孫二人詩李詩杜太君賢明有高識疾旣亟呼啟升而誥之曰曩者而父及前母之葬也不慎蟻穴其幽堂繼復改窆於楊秀之隴廬而得妥神明之道宜專以靜遷掘發露鬱陶于余心我死將必穿先人之壙而藏焉是重震撼之也合葬非古祔之不如其離之也苟擇不食之地埋我足矣啟升泣而識之行營高敞焦勞奔走閱十一載而得吉壤於青山之陽乾隆二十有四年龍集己卯十月廿有二日得以畢窆窆之事奉狀謁余而言曰禮經掇拾於灰燼之餘而云合葬非古其然乎其不然乎余應之曰奚爲其不然也生今之世吾

不敢反古之道以時與勢斷之喪期有定限塋兆有廣
狹年壽有修短境遇有豐嗇先王體孝子之心而不使
之傷通變禮之窮而不徇乎俗意至深厚也太君以安
先人之魄兆爲計而不牽於同穴之私愛識加于人一
等矣余特表其大者而以獨於墓兼以破今世言禮者
之拘其辭曰

惟古有禮不合葬士喪踰月卽營壙義取妥幽毋震蕩
毋泄地脉役巧匠後世德薄慮速詢區區聖周苦挨傷
五父之衢事非創異室同穴頗近誑吁嗟唐母識高廣
治命數言理甚鬯哀哀嗣子泣勿忘行營一紀心悒悒

青山有原兼奧曠崇岡逶迤枕繡嶂左龍右虎勢交讓
宜爾子孫百祿貺楊秀之冢鬱相望豐碑四尺準古樣
鏡詞詰屈簡且當表母懿範百世上

李母朱孺人墓表

南礪智朗禪師俗姓李氏少歷貧辛實倚母氏以活出
家爲浮屠道力精進來主理安方丈欲報母恩以大顯
其賢行撰具行狀求余一言諾而未果也旣十年矣乾
隆甲申春師買地於江寧鳳臺門外改葬母骸屬吳隱
君樹虛銘其幽復敦余爲墓表嗟呼有諾責而不能已
食言之愆余不得辭師之孝與母之慈可沒而不彰乎
乃據狀而爲之系曰母姓朱氏江寧望族性婉約父善
因名曰善女年十六歸同縣李君令聞生三男一女而
季早夭令聞儻慕嗜酒不事生產家日落孺人泣諫再

三不聽跳身走江右聞歲不歸孺人貧乏不能存活寄
女於兄公所攜二子自隨藉十指以給餽鬻有盜夜入
其室伏蔽幽隱爲母窺見乃左挈大兒右挾利刃呼曰
室貧如洗徒警我兒吾不與俱生矣舉刃欲擲盜聞驚
竄鄉里服其膽勇往依仲妯娒賢割宅舍之冬夜雪
大作尖風鏃紙窗獵獵如猛獸哮闕少子怖枕母鄰促
母就寢孺人好語之曰汝明日不要喫飯耶語甚酸楚
不自知其夜之深也早夜操作尪弱漸不支姑從兄公
所來視疾涕泣訣別絮語嗚咽不可了姑袖餅餌與之
食哽塞不能下咽矣呼大兒使前曰吾妊汝時聞辛羶

卽嘔吐婉汝時夢膜拜禮佛汝於佛門有緣宜爲佛門
弟子又令臥足後曰明日恐不復見也語益酸氣息益
弱竟以凌晨泊然長逝時雍正甲辰六月十有三日也
距其生在歲之辛未僅三十有四云大兒遵母命出家
觀音菴旣而令聞歸挈其少子去不復返少子後亦爲
僧族長以孺人非壽終葬之祖墓之外歷四十年乃得
改葬孺人飢劬艱苦其嗝音瘖口之事隱君不及詳也
余卽智公之所述不漏不支以慰孺人於泉路猶孝子
之志也智公以澹泊撐拄祖庭以樸實了徹大事以文
字報荅母恩宜銘以彰不朽銘曰

母歷貧辛煦嫗如春澗二佛子焜耀僧史剖碑墓門以
報母恩徵孝與慈視此銘詩

道古堂文集卷四十七

仁和 杭世駿 大宗撰

墓碣 厝誌

戴珠淵墓碣

珠淵姓戴氏錢唐人名廷熺字綸掌珠淵晚所自號也
少爲吏茶陵彭少詹領浙藩獨以文藝見知工詩與王
孫華丁敬金呖張場及漢陽張夔倡酬於城南登六和
塔賦百韻筆不停綴名章秀句冠壓儕偶有田百雙宅
在吳山山楹岫幌足以送老謀爲場大使斥賣殆盡旋
奉裁失職而家赤貧走京師依梁少師主其酬應文字

之湖北參學使者慕歸益大困余與諸老聯吟招入南
屏之社山條水葉之間孤僧秋士笠屐往還而珠淵亦
頽然就暮矣荒街破屋擁一老妾賣畫營餐而炊烟屢
斷其涼踴可想也病不能興遂以卒年七十六孤樹元
貧不能卜窀穸恐余一朝溘逝莫有能銘君者先來乞
銘銘曰

匪命之舛而謀不臧嗟所如之輒蹇而詩獨昌昌其詩
莫謂並世人不知青山白雲堪自怡白楊撼撼酸風嘶
魂兮歸來空閨蓬鬢淚盈把陰蟲絮砌霜繡瓦

欽天監博士張君墓碣

君諱永祚字景韶號兩湖世爲仁和人籍錢唐者自君始隸郡學爲弟子由錢唐也會祖岐然廩生後出世名載邑志祖元時邑諸生父奏邑廩生自君以上五世皆列膠庠獨君數奇不得一當母徐處士士俊女通曉星學甫離孩抱卽夜從母仰瞻五緯已異凡兒長益究悉占天其宿習也天竺山中農家有女不肯妄許平人得青一衿始可有欲爲君蹇脩者而君年近立猶困童子試謾以博士弟子員應遂委禽入贅從予假襴衫攝盛而往久而察其非也且泣且訕督之攻苦益力交河王

學士來典浙學旋被知遇而君儼然真爲諸生破涕始
爲一笑無錫嵇公以大學士總制浙閩求能通知星象
者以應乾隆二年二月 明詔試君策立成數千言大
器之薦於 朝授欽天監博士始棄諸生服一再引

見占候悉驗寓大學士公訥親賜園公無子使參三命
微諷以脩德致福而公不能自克君察其不可久居稍
稍自遠會 詔刊經史華亭張司寇照薦君校勘二十
二史天文律歷兩志用君所長也書成方俟議敘而君
遽乞假歸取平昔所著天象源委足成之凡二十卷一
卷言象理二卷言象法三卷言象度四卷恒星五卷占

時六卷至十卷占歲十一卷命法十二卷求地平宮法
十三卷月離十四卷命理十五卷西法十格十六十七
卷選擇十八卷風雨占十九二十卷分野而以董仲舒
祈禱晴雨附將錄成以呈 乙覽而君不及待也某年
月日卒於竹竿巷萬氏清白堂之寓齋年六十有口無
子族子果葬君於龍井之新阡以孺人李氏祔有女能
傳其學嫁諸生沈度其書在度家今度夫婦皆死恐遂
湮沒故詳著其例於篇後有通知其意者可以述也銘
曰

屈首經生非所長抑志測驗道乃昌歸而沒命於此藏

藏乎此著書滿家君不死

孝廉父萬夫墓碣

向嘗以馬卿消渴王粲體弱論江陰翁霽堂徵士之文
適相合也今又得之於吾友父君萬夫萬夫名聞望原
名繼淞因夢兆而更名字婁江萬夫其號也世爲仁和
人曾祖朝焜祖均考錫武生四子君其季也以後兄錫
壘體清羸不勝衣恭敬姁姁言若不出諸其口書籤藥
裹錯置左右時時在病中也嗜學若追趨遂嗜剛蟲秋
隼不足以喻其驚行文若焱至電掃犯砥柱鬪霹靂不
足以喻其勇也生平無他師師雲廷王先生後卽以女
弟妻君者也學醇而文肆厚積而薄發茶陵彭少詹來

視浙學餽君於虞岸溧陽任閣學來典浙試賓君於鄉
飲稍稍穎露矣而未竟其所蓄也計偕報罷而疾作觸
熱遽歸時本生母吳太孺人猶在堂知不起恐遺母憂
恒自力叔兄泐來視霜華繡瓦秋氣襲人手挈絮衣衣
兄彌畱數語酸楚不可述則念阿嬈不置也年僅三十
有一時雍正八年九月八日也妻爲贈通奉大夫歲貢
生王諱元斌第三女無子以兄泐次子祁庠生蕙繼余
與君居同里以文會者五人曰吳曰江源曰汪浦君
年最少而先死余齒長而尚存才者不必壽壽者不必
才固也君文不磨死可也若余者千言萬語無一字可

以傳卽極之上壽其爲無一字可傳如故也於世爲不足重輕之人造物不斤斤斲其死生脩短也而君之於才刻削暴殄不畱餘地以處後人庸衆所驚爆而造物之所媚忌也宜其死也嗚呼銘曰
噫乎萬夫有才不售不售何傷而疾不瘳噫乎萬夫不憂其疾而憂其親之憂至性醇篤追前修藤緘三束土一邱骨體瘠瘦文貌貅銘辭搜搜如清秋設我不爲誰其優

明經王澹和墓碣

王君澹和淳懿溫茂生有賢詰之資從余年友勗闔王
先生遊學不泛涉能以經術經世務作爲歌詩不煩繩
削自合規矩不幸死矣年僅四十有九時乾隆歲在戊
子六月二十四日也訃聞士友奔而視含斂者以百數
三黨之被君恩禮者悲號聲殷牆屋澹和身後無餘財
非有所幾望也明年仲春望後諸孤柱等葬君於楓樹
嶺之新阡來乞銘嗚呼世儒夸毗爲文諛墓中人辭多
失實余與澹和交在吾爲忘年以君之制行余雖北面
而猶恐不足當君意也班固不受金蔡邕無媿色是非

明而心術正言無枝葉信而可傳必矣乃爲志曰君名
德溥字容大一字澹和其所自勗也士友曰名爲實實
澹和之稱故當不復稱前字云家世山陰山陰之王望
出太原高祖思林公始遷錢唐父鈞筮仕當爲州邑親
民之官不就母羅孺人有賢明之聲克篤生君發光蘊
靈將熾而大君寡兄弟終身孺慕事親孝執喪哀行營
幽竈犯寒暑披荆榛至十稔而始獲吉地於蓮華峯下
琴城南峻病已不支令友人陸飛寫種松圖以寄哀君
之事親之道盡矣山陰宰樹屢爲盜伐訟於官每庭鞠
輒號泣自責聞者酸感寘盜於法割田俾族人植松楸

奉蒸嘗俾勿翦拜外王母無後生於我乎養歿於我乎
殯姊氏早寡割宅以居之撫二甥如已子族毋誓柏舟
之節請於有司聞於 朝獲崇臺綽楔之旌君之親親
之誼備矣勗闇已所師也次檐王君爲諸子師相繼殂
謝經紀其喪兼及其身後與人交吉凶緩急未嘗以亡
爲解或至盡歡而不能全交君惟自咎而已未嘗按曲
直也君於師友之間無遺憾矣而吾於君獨求備者篤
於行仁而不計財之贏絀勇於爲人而不辨世之貪廉
至於財絀事沮貪夫徇財而忘義鼠牙雀角鬪堂鬪室
迫迮嗣子使不得寧處觀過知仁君子不以是咎君貽

通下集卷四十一
謀之不善也君娶於李先卒有三子曰柱曰樞曰椿易
簣前索紙書一詩凡數百言以戒子神明不亂靈光炯
然銘曰

與田蘇游而曰好仁方之前古有其比律之晚近無其
倫天道無親常與善人於其子孫不於身嗚呼身雖不
顯道則伸

林阮林墓碑

醫與詩分道而馳各有所難能兼之者古無其人也啟
元子王砥爲少陵內弟而未嘗許其能詩劉守真張潔
古王海藏李東垣朱丹溪著書滿家而詩無一字以余
所知吾鄉之兼擅者有二焉張遂辰卿子早謝諸生業
業醫自給所居至以名巷蓮門白下諸編氣高體潔清
流之望歸焉陸圻講山名冠西泠十子以黨禍避跡吳
中謁病者如市陳處士引倩采菽堂論詩提唱風雅士
論翕然著錄盧號易之門不得其活人之術信矣能兼
之者之難也海寧林元字阮林其伯祖大文判太醫院

世宗在潛邸嘗令其療閩徵君百詩之疾名著儒林大
文以醫顯而其弟鴻暹官陳州牧卽君之祖也考諱世
俊雲南永昌府太守君十齡而隨官陳州又六年而侍
父往永昌二十而奉永昌之諱未幾而陳州之訃亦至
自滇至豫崎嶇萬里克襄大事其識定其膽堅也歸里
踰年而母氏吳恭人又卒哀毀之餘卜地於黃鶴峯下
葬其兩世堂斧削成松楸行列人咸慶永昌有孝子陳
州有順孫也旋以墓近杭州遷家會城癸丑之秋余自
京歸里與結湖山之社曠黑至君舍卽止宿雞黍之供
咄嗟而辦捶琴刻燭未嘗不達曙也君詩清深有理致

拔奇於韓鏗洵炳煜淺衷者讐焉深心者喻其甘苦也
性通悅不問家人生事偶營什一輒被欺給婚弱弟嫁
孤妹屏當箱篋先人宦橐罄矣輒思以賣藝償還其故
物余爲曹邱游說百篇之秀句不能博一餅之金生計
大困素難向所熟習張仲景巢元方兩家之書橫豎穿
穴啟其秘鑰此卽君囊底之智也非甚危急之症不肯
妄詣人時俗工林列以李仕材張景岳爲枕秘而君所
切究者皆華陀褚澄孫思邈許叔微唐以前之書與語
輒舌咋頸縮處方量藥爲羣醫所側目以故道貴而術
不廣余以君清思決之而知君之於醫真金匱之真言

而玉機之微義也張卿子陸講山而後得君而鼎峙矣
大宅鬻於人屢徙皆不稱意孫君隱菴嘗濟君於厄而
又前死汪編修韓門遠遊保定余聞滯廣陵獨倡無和
妾頑而嗜酒拂鬱之事閒見層出腹脹如鼓堅不可摩
病十四日而遂卒乾隆歲在丙戌六月七日也年僅五
十有八書潤屋藁老眉集其詩也讀書識字錄意蔬餘
輝文選難字其雜著也醫學精蘊叢書方歌袖鏡醫門
撮要醫學辨難其醫術也兼工寫生山水花鳥皆入逸
品娶於王先卒一子名霖明年某月日葬君於臨平山
之鮑家渡來乞銘銘曰

天元玉冊上古所傳四言肇始先三百篇非雅非頌妙
得言詮後有作者莫或尚焉惟詩與醫其途本合天師
少師各著問荅或昧其源妄肆噂沓方心拙辭品類遂
雜極命草木遊心黃義是惟詩伯乃可爲醫洞見癥結
洗腸剗肌是惟良醫乃可爲詩維長林子家以醫顯改
而說詩知言之選吁嗟道衰世無和扁靈蘭玉版待子
而闡胡君十全而不自謀神達理舛鬼與命仇鮑家之
渡有土一邱夜臺寂寞無人倡酬

沈房仲墓碣

昔眉山蘇氏父子兄弟自相師友史冊書之以爲美談
吾鄉沈氏其殆庶幾乎東隅先生爲海昌查少詹聲山
愛壻其作合也以詩有子三人次公房仲則沈氏之東
坡也浙西自朱檢討竹垞殂謝海內之稱詩者以海昌
二查爲巨擘房仲少從初白翁遊繼又采獲於查浦侍
讀初白稱其含英咀華宮商協奏不難步武香山凌鑠
蘇陸而侍讀亦無異同之論其族叔歸愚亦謂視天地
閒無結轡不可解之事亦無哽咽不可道之辭士林以
爲篤論房仲流覽旣富遊歷漸廣南踰嶺嶠北抵梁齊

過都歷塊以沈雄磊落不可控抑之雋語一洩其胸中
之奇凡從學於查門者未有能過之者也初白翁有女
孫愛其才遂請爲繼室盧吉士六以序東隅先生之詩
引謝師厚以女妻黃魯直事以日少詹查浦又述其語
以目初白余謂授受淵源卽繼以婚姻之好遠自聖門
而燉煌繼美韓之李漢朱之黃幹均斯義然則海昌爲
沈氏兩世之壻鄉謂吾舅者吾謂之甥爾雅釋親有四
而房仲居其二以母黨則彌甥以妻黨則館甥也房仲
在兄孟公弟菽林之間無腰鼓之誚菽林觀察登萊提
刑齊豫宦轍所至遊屐必偕家庭燕語朋友遊處獻酬

羣言抒寫獨得皆以詩爲職業若起居服用之不可須臾以離又若飲食男女之不可一日以廢竭心瘁力歲月耗磨欲詩之不工且富其可得乎歸老窮鄉有孟東野之窮無張子野之壽其可哀也亦所以成其爲詩人菽林葬君於某山之原謂余曰吾兄辱與子厚志墓之文非子莫屬余曰諾房仲名心仁和諸生家嘉善有孤石山房集系以詩曰

君貌不揚詩最工清氣盎盎蟠心胸墓門樹檟號寒風中瘞瘦骨如青銅瘦骨或朽詩不朽斯語請質初白翁

孝女吳淑士墓碣

孝女吳瑩字淑君私諡淑士海寧人也父應鳳患滯下
伯兄琦文重繭走二百里之石門覓醫醫遊武康卽迹
之武康血流被屨不知也醫齋術不肯行處方與之益
增劇琦文哀憤甚引刀割股而刃弗殊一臂幾折執喪
廬墓三年母汪以晝哭故將失明朝夕舐之數月而光
復旋患隔中死法琦文博求方術以時消息其病之所
起主其湯液醪醴者女弟瑩也視無形聽無聲綿冬及
夏不夙則莫脇未嘗貼席口未嘗甘味也歷六七年而
母瘳而孝女憊矣形瘠神離不可爲矣年二十有九時

康熙歲在甲戌六月八日也琦文獲旌入忠孝節義祠而孝女不得請何也琦文之孝顯孝女之孝隱顯者可以辭達可以筆述官司可據以入告隱則深知者能信不知者不信也又非可人人強而與之語又非可人人強而使之證也兩楹之殯閱九年歲在壬午某月日兄子有曦始克葬於硤石祖塋西偏蓮漚之原碣曰孝女吳淑士之墓女徹環瑱願養父母如北宮之女嬰兒子之所爲母哀其志贅同邑朱氏子爲壻女故朱氏婦也宜稱婦說春秋者曰婦者從乎姑之辭也孝女不及事姑無阼階著代之文無三月廟見之事孝之名縣而

無薄不屬於母而誰屬也孝於母在吳則爲孝女穀梁子所謂以我禮之也以我禮之則猶然女而不婦也女而不婦則婦之不可也會子問女未廟見而死如之何孔子曰不遷于祖不祔于皇姑歸葬於女氏之黨壻無御輪之迎父無反馬之致魂魄得依所親聖人之所不禁通儒之所不議孝女之孝雖九原不隔也然則可祭於祠乎古無其禮也古無其禮而吳氏行之所謂禮以義起也考有宮而孝女無子奠有牖而孝女無女無子無女而有若敖之餒是吳氏之愍其祠也所以酬其孝也諡曰淑士義何居也詩曰釐爾女士女有士行則與

凡爲女者有閒孝女讀書明大義從伯兄學潛心經術
非聖之書不觀吾志其墓據經以立言孝女之士行見
孝女之純孝亦見系之詩曰

惟孝有五不及婦人男統乎女聖經不云女嫁曰歸義
在食貧有舅有姑至死服勤偶或歸寧不能終身抑搔
疴癢勢不得伸北宮嬰兒冠古鮮倫至老不嫁志在養
親脩川女瑩降靈自天依母爲命若將終焉母爲擇對
不送之門壻焉出贅女不往嬪母疾危厲食不下咽蛾
眉宛宛含愁而顰量水稱藥斟酌等分時其起居時其
夕晨時其消息忘寢與殮洗手作羹味邁八珍母飲而

甘母食而芬回翰造化收名魄魂以女精氣益母元辰
綿八寒暑沈疴頓捐醫工咋舌技窮而歎歎女純孝驚
猶天神母則痊矣女則瘵矣神離形瘵大命莫延偏親
號咷伯兄涕漣兩楹布奠有文一篇誦女力學非聖不
觀生孝猶易死孝實艱使堂斂阼褻衣不陳漆鐙無光
總帷久懸鼓塗不啟凡閱九年兒子猶子葬之新阡蓮
漚之兆松柏萬千謚曰淑士告於几筵碣曰孝女表于
隧埏敦我一老據經立言春秋書法禮堂舊文虛公酌
議諫辭璘幽煒我彤管以俟愍綸

節孝趙母楊孺人厝志

余與同里諸趙交故深主事君松谷尤交久君有才子
曰秉恕德配楊氏是爲璞巖公長女自幼至性過人年
十九成婦禮相夫力學夫嬰疾侍疾三年無倦疾爲誓
以身殉繼念堂上翁姑耄矣遺孤藐然趙氏三世單傳
徒死不足塞責乃稍稍自活肩子父而似續之事翁姑
惟孝視丈夫子有加姑王恭人卒孤尙少孺人居喪克
易且戚得主事君心主事君嘗謂余曰吾老而無子且
喪明恃吾婦賢能能治吾家吾以待吾孫吾家非是婦
亦云殆哉語畢輒嗚嗚泣余因是知孺人之以賢婦兼

子職者有然也遺孤就傳出而揖客余曰是兒卽趙氏孤兒耶恂恂善士誠知母賢孤旣長主家一稟母訓克孝厥祖久之主事君棄養孤子承重盡哀而有禮平居晉接故舊父之執友如其父祖之執友如其祖余觀其孤更有以知孺人之以賢母兼父道者又然也乾隆二十三年勅封孺人二十四年秋疾卒年五十有一守志二十八載朝以節孝旌其閭嗚呼若孺人者其無愧乎斯旌矣子一人樹元國子監典簿孫三人承熙承烈承勲孫女六人二十六年辛巳春樹元扶服衰經稽顙于門請曰不孝有祖父之喪感未卽窀穸無敢渴也

謹筮三月二十五日將權厝吾母于八盤嶺之原唯公
知敢乞銘銘曰

是厝也于道爲權權焉用文然古有行之者今何爲不
然匪余文之不朽繫節母之德賢母賢可傳後有銘視
此磚

周母蔣孺人權厝志

孺人蔣氏元公之苗裔中吳之舊望父羽彰有名太學
娶於周卽孝廉爲鬻從姑也孺人生稟清姿長捐俗尙
前豐後約婉嫕順遇年十九來嬪顯族是爲重親執笄
而見君姑降自西階以室事相嬪摺挂內外俾孝廉獨
全性天溫清之餘緝誦而已檢誨諸子不貽世羞再執
斬齊之喪色容劬悴母氏隨兒之官沒命瘞域中情盡
傷遂致勞瘵如何不淑春秋五十有二喪高柔之賢妻
叙孫楚之哀誄古今同喟青史氏可得而記也卜壤不
吉越五年權厝北郭拈花舍旁乃爲志曰哀淙響咽元

陰沍重泉宮未啓翠碣待礫風生松檟兩點房櫳髻爪
長埋鏡奩永封宛宛嬌女哀哀孝童絲蒿夙駕塗靈厚
終大幽莫耀長恨焉窮徽音可嗣懿行宜崇圖芳斯在
煒我管彤

道古堂文集卷四十八

仁和 杭世駿 大宗撰

家誌 停棺誌 塔銘

先伯祖壙銘

伯祖爲曾大父敬字公長子諱士瓌字耀生年四十五以康熙甲寅之十一月某日卒初娶趙氏無出繼馮氏生子鉞暨一女皆早殤葬石屋嶺祖塋公儻寡嗜酒不事生產趙孺人來歸時有臨平上田二十二畝爲奩贈故衣食得以不乏暨孺人卒乃大困曾大父哀其無後爲續婚馮氏旋得血疾一日倦卽臥榻呼之飯不應日

跌卽而視之死矣公與物無競不以憂感滑其天倪而
年不躋下壽後嗣中絕豈稟於天者薄與抑命也銘曰
嗚呼我公淳淳而生悶悶而醉胸無城府口不臧否叶
名非所懷亦不言利狸骨少方玉貌孔悴四十五年不
得行意葬公高原嘉耦維二石屋嶷嶷北嶺拱翠

先叔祖壙銘

叔祖爲曾大父敬字公第三子諱士珍字寶森爲人敦
重不佻年二十六喪施孺人遂守義不再娶晚得風疾
步履不能過十步坐臥一室左壺右觴獨自斟酌康熙
庚寅十二月某日以壽考終牖下年六十有八葬石屋
嶺之新塋銘曰

目鰥鰥行蛩蛩篤義不娶表彭風疾引年酒扶壽言無
玷尤行不繆六尺幽宮八尺櫬滿覺街南石屋下元陰
掩靄奠三雅誰其尸之從孫也

志伯兄殯

乾隆甲子天不憇遺奪我家督七月二十六日伯兄子復先生以疾卒於大方伯里先人之廬猝無以歛假北堂之美櫃附身無憾踰月殯於昭慶寺側民家喪車解廟執引而行者數十百人過舊里祖奠者又數十百人
有行哭失聲者嗚呼布衣紉履之士何以得此於人也
兄性慈愛事親孝母性嚴急語不合叱詈隨之怡顏順受無忤色與人交財不私一錢疾病之不能醫藥者死亡之不能棺槨者傾筐倒庋與之不過問也祖母王兄若弟貧死無後外祖父母暨舅氏兩世不克襄葬事購

地於石屋之陽春秋窳窳以成先大人之志其見於施
設者此可以例也吾同母者三人伯姊未四十而死伯
兄不獲臻下壽吾以憂患頽落之身如枯株病葉縣綴
於世其可久恃乎兄有子三人皆未有樹立書此貽之
俾他日揭於墓焉

節姑許母杭孺人墓甄

姑歸許宜與夫合葬夫墓迨不足以容則將耐於皇姑而許氏之墓無隙地則將買地以葬而姑子死孫天血肩中絕許氏無可謀者例以戴媯大歸之義則葬姑非余莫適爲主也余嘗卜幽窆以妥三殤在西溪割其右以葬姑而爲之記曰姑爲余祖考贈文林郎翰林院編修諱士瑋之次女祖母王太孺人所生年二十嫁許君懷遠二十九歲而夫死家無寸絲斗粟先府君哀而迎養於家佐吾母鞠育吾兄弟姊妹有恩義先府君爲娶子婦生孫漸立家室年六十餘條其苦節以達於有司

得旌於朝余與修全省通志列其姓氏於列女計姑
一生得吐氣者惟此一節爾不十年而姑以天年終而
子旋卒三孫皆夭飲冰茹檠貞之數十年而不獲報吾
於彼蒼不能無憾幸而遲不肖以後死而體魄不致無
依則天心與善可推也不記歲月不刻樂石書丹於甌
納於幽壙而存余文於家乘哀母之節也

三殤瘞輓

余有子十人而殤其六第三男寬仁游於庠婚於室而卒不祿爲立後記曰子不殤父弗殤爲所後地也將卜地而葬之而未得第四曰宜仁五曰容仁六曰定仁七曰宥仁十曰宜仁其中有長殤有中殤有下殤桐棺纍纍殯於淺土恫然有餘慟焉西溪有不毛之地以三十干易之不筮不卜不封不樹次其長幼而先後瘞焉無行誼可紀無文章可錄無聰明穎悟可憐念慈愛之念減而悲傷哀悼之情衰止報服之制闕焉而不脩非愆也事就其簡而禮從其殺亡於禮者之禮也嗚呼以余

之不德也幸及於寬宥而天不卽降之罰凶瘞天札洊
加於童幼而貸余於緩死使之得終事太夫人而無終
天之憾然則是諸殤者先後代余受罰皆謂之仁人孝
子可也瘞之埋之天地之心父母之責於是乎在不可
以不志而系之銘曰

爾曹蚩蚩靈幽體翳魂氣則無不之葬之中野以畢吾
父母之恩志之銘之以抑吾無窮之悲死而有知抑其
無知嗚呼哀哉

女夫丁秀才停棺誌

停棺何以志創也禮大斂畢而殯今人之殯在野古人
卽家而殯夏后氏殯於西階之上殷人殯於兩楹之間
周人殯於阼古者棺必有槨槨外敷木而塗以泥累以
瓦甃是謂殯仁人孝子見棺而痛親之不見無時之哭
不可節也故大夫三月士踰月必葬葬者藏也欲人之
不得見也故先之以殯而殯非久制也况不殯而至於
久則死者有暴露之憂而生者有目瞿之感違禮而干
律不祥莫甚焉吾於女夫丁秀才之死而不能已於言
也秀才名健字誠叔隱君丁敬之長子未冠隸郡庠爲

弟子故不稱其名而曰秀才名終則諱之義也秀才從
學使者校文於江南老屋被吳回之災賃屋而居死焉
隱君旣得新宅必將殯秀才於野而後遷禮也隱君剛
愎卽移其柩於新宅屢言之而不從而末如之何也未
幾隱君死家貧春秋窶窶之事未卜也余與吳城江沅
皆其石交謀於其次子傳三人願經紀其喪而傳愎如
其父斷斷然設爲迂遠而濶於事情之論余又莫如之
何也秀才謹而愿詩才秀飭而語呐呐然如不出諸其
口吾愛之修秋襖於吾寄巢老成宿學如朱太守樟周
徵士京金副使志章厲孝廉鶚皆在出技角力而秀才

以末座少年詩獨擅場余修海塘志於脩川掣之偕琳
宮梵宇憑高發興秀才與余相應和未嘗不出余意外
也旣又辭余獨往脩邑志於金谿體裁鴻整而吟興尤
高歸與余門人陳侍讀鴻寶薄遊廣陵守風揚子聯吟
百韻希風韓孟無媿色焉性嗜飲癡發於尾閭醫多言
不救余延之貳室而令余女時其與居飲食年餘漸起
余時時諷以止酒而不能自克省余於廣陵畱止月餘
勸之熟文選鐙光晃耀眼花不能辨難字歎其早衰而
精氣薄心竊憂焉別去數月而訃至余哭之慟祝予之
悲累月逾時而不能自己將俟其葬銘以抒余哀而耄

不及待爲志以昌其詩城與沈聞之有同慨也

詩僧亦公塔銘

西湖山水甲天下精廬淨宇基峙星布方袍圓頂之徒
率皆舍內學孰吟事意其林棲谷隱絕遠塵壻必有超
妙清悟之旨如慧遠洪偃其人者以吾所見僧伽持四
分戒本十地羯磨結制苦行者往往而有詩律之細不
下禪律解脫繫縛排竿蔬筍十不得一而求之於吾鄉
尤希錢唐亦公名上緒亦諳其字也貌癯骨寒持行清
苦無世僧拈槌覽拂之習智光內映元理獨超破戒作
詩發中機的鄉之詩人若陳撰金農厲鶚符曾施安皆
樂與酬和居士汪潭等請主葛嶺之涵青院久之去遊

京師晚主相國寺雍正甲辰以病示寂有盃後集十卷
其徒慎機等葬之南山來乞銘銘曰

惟公學人早受記荊木食草衣不根而殖具大願力以
禪爲詩屈踰偏右九僧是師曾潭不波石罅微坼天風
忽來響振林葉靡提不已悉檀無方惟此五字獨得瓣
香悠悠吟朋願言則噫謂上人語故有秋氣雲掩水流
一笠遡返耨鉢無聲韻在青簡在昔寒拾祖英瀑泉石
門潭津梵夾是宣請勒公詩藏以佛腹東林之後來者
可續

賜紫住持南屏淨慈禪寺瑛虛大師塔銘

師諱演中字大恒後改明中又字瑛虛桐鄉施氏子生而茹素七歲出家秀水楞嚴寺從師某薙染某早世師祖舍明教之讀儒釋兩家書穎悟非凡雍正十二年遊京師受具 皇戒

世宗憲皇帝於千僧中選留有根器者二十二人侍講佛樓師在其列復於二十二人中選得四人師又在其列 特旨住吉祥苑池南叅究禪學

萬幾之暇日必一至查問課程訓諭詳切

聖意於師尤篤 恩賜手勅數千言發明本地工夫及

杖鉢如意法帖等物未三年

龍馭上賓

今上御極奉 旨出居許各還本籍乾隆四年得法無
闍永覺禪師始易演爲明蓋從玉琳國師四傳支派也
六年主席西湖聖因寺寺爲

聖祖行宮供奉龍牌百寮肅謁永爲香火繡嶺屏圍花
隄帶繞招提 宗煥冠於諸刹十方仰師清望檀施雲集
接衆安單日常至數百人師指挂內外香積無缺三門
倚爲龍象住持十年山陰道俗介邑侯舒瞻請師駐錫
乾峰寺智杖暫臨旋歸湖上移主上天竺方丈天竺香

市盛于補陀爲僧伽所豔羨禪鑽百計矚附莫由師爲
諸大吏所引重清望彌彰纖塵不染器鉢無聲法雲徧
滿十六年三月四日 翠華南幸駐蹕寺中 御製七
言命師仰繼日未移晷恭進一律并進 聖駕南巡頌
十八首冊皆畱覽十一日

聖駕再幸天竺師具奏上中下三竺皆土人習稱懇
皇上勅賜寺額蒙 恩賜名法喜寺 宸睠俯臨天章
下賁與雲林淨慈並峙從師所請也是年冬進京祝
皇太后萬壽 賜如意一握二十二年移住淨慈

聖駕南巡獲邀 賜紫二十七年

南巡復 賜紫 御書片石孤雲窺色相清池皓月照
禪心對聯三十年

駕幸淨慈三次 賜紫 御製詩一首水光山色一合
相暮鼓晨鐘二六時借問關黎消盡飯孰爲本分孰爲
詩卽寺中手書以賜刊石寺中雲漢昭回照耀山谷爲
前此住僧所未觀慶師遭際者猶津津溢齒頰焉三十
二年患嗽上氣之疾命法嗣實蔭代理淨慈院事養疴
乾峯病劇諸門人迎回淨慈次年二月一日示寂僧臘
五十一世壽五十八辭世偈云五十八年一報周謝家
活計霎時收披袈赤脚千峯去不問蘆塘舊釣舟建塔

慧日峰下八月二十二日丁丑入塔方外之交獨余未
死則銘不得辭也師天性冲夷耻與物迕併拂蕭然健
椎不設而戒律精嚴道風秀世柳子厚所謂以儒通佛
者近是餘事爲詩性海湧現間涉繪事妙參三昧得其
片楮者咸知寶重或以畫禪詩聖目之夷然不屑受也
晉有林遠唐惟禪月反覆比儼庶得髣髴士友以爲實
錄云銘曰

七歲出家唐惟楚金伽盧七歲亦投叢林天欲不交永
離垢淫童真梵行根器乃深楞嚴刻藏富有梵夾半滿
字參一冊易挾智珠在握蓮性不乏以清淨身求了空

法定慧具足戒律尤高心腑灑練脚跟踏牢千山行脚
發願打包用賓法王慶師所遭瘁經佛樓天厨施食花
雨禪機侍

帝紬繹飛錫西湖四主法席紫衣三錫輝映佛日翳此
西湖秀絕寰區五山十刹環峙四隅有教有律與禪攸
殊苟能見性異途同趨青山巒巒白雲油油春非我春
秋非我秋消受盞飯孰非

帝床奄忽示寂仍然首邱漆龕旣封石塔斯築慧日岵
呀風氣完淑萃然一杯覆若夏屋泚筆銘幽繫我不辱
三界沈寐必有摠持踈梅幾朶清泉一支天光偶發溢

而爲詩水流花放師其在茲

住持秀溪龍翔寺嶺雲大師塔銘

萬峯山房樾堂和尚退院地也宗鏡毗連雷峰當面旋
螺而入拾級而登浮嵐暖翠近挹几席故南屏之奧區
而棲禪者之桑下矣樾堂家法不廣收徒衆一派單傳
粗承衣鉢而已嶺雲大師則其法嗣中師子兒也師名
篆玉字讓山嶺雲其號仁和萬氏子年十七投淨慈雍
染受戒昭慶嗣法雷巖傳臨濟正宗第三十五世貫通
義疏精研戒律雍正十二年遊京師和碩莊親王招
住海淀法界觀心佛堂十三年四月十二日侍郎海望
帶領引見奉

旨速還會同永覺禪師超盛清查加封妙圓正脩智覺
禪師法派仍住萬峰本色住山游情翰墨善鼓琴工行
草句法摩圍生峭可喜或者自爲教外之支流余特以
禪宗正覺許之佛本行經言太子方入學卽問師六十
四種梵書大樹王子彈琴對佛香風萎花爲首楞嚴絕
妙好辭天親無著以造論之才一轉而爲寒拾青蘿賦
夫東坡追步不及張無盡以居士反附契嵩以傳詩有
別才豈非性光中光明藏哉普天下堂頭根塵昏蕩撥
取陳羹土飯輒作拈椎豎拂之語刊布語錄相去殆不
可以山句計矣余獲宥歸耕卜宅清平山下惟時詩壇

諸宿老皆康強無恙繼入社而代興開設壇坫實肇始於南屏折脚鐺邊烹葵燒筍施天龍之食師有力馮山舫落成焚虛大尊宿爲畫壁一堵清吟抱膝韻播菘林雖片席地與五山十刹莊嚴樓閣相聳峙則詩禪兩絕也乾隆十六年德清令李芳榕請住棲水之大善寺六飛初幸江浙制府遴選道德清高十僧迎 鑾以備顧問師在其列

聖主回鑾送至碧天橋垂問後卽遣內大臣賞 賜小元寶十錠誠異數也山門淡泊損衣縮食爲衆僧謀粥飯不暇一住十年不萌退院之志二十五年桐鄉陳令

虞盛請住秀溪之龍翔爲地藏菩薩道場貧瘡畧如大
善樂其閒靜師卽以爲安禪立命之地若將終焉三十
二年重九日作辭世偈云來無一物去無一物快活七
九逍遙自得卽於是日入滅并說封龕偈云天地爲屋
日月爲築復闢一龕以閟幽獨世壽六十三僧臘四十
六詩名話墮凡十卷南屏續志一卷補前志所未備也
某年月日將反葬於南屏孫心舟先來告期且請銘乃
從彼法而說偈曰

來無一物去無一物請參一轉不添一物物外有琴可
以寫心有詩有筆自寫所吟師具三者住此精舍散聖

安禪遭世譏罵哀哉世僧百無一能造作語錄調謾莫
懲或頌或偈或拈古德勳惑愚蒙妄據法席假如說詩
嚴過律師叅大乘禪異於辟支無所能人以性鈍故以
識闇故媮不學故移情理性超凡入聖形和氣和心正
筆正遡師傳衣相契甚微旣入於機又出於機師非無
言遺著滿室木脫潦清秋澹無迹我行南屏禪扉晝扃
巾拂挂壁雙丸不停磻語幽修風簫斷續松柏九九長
閉幽躅緩諷二偈音如雷震師乘化盡我猶爲人謚德
累行誅而不哀師一生死哀胡爲哉